
PWYLLGOR CRAFFU ADDYSG AC ECONOMI DYDD IAU, 10 HYDREF 2019

Yn bresennol: Y Cynghorydd Paul Rowlinson (Cadeirydd).
Y Cynghorydd Elwyn Jones (Is-gadeirydd).

Y Cynghorwyr: Steve Collings, Selwyn Griffiths, Alwyn Gruffydd, Judith Humphreys, Elin Walker Jones, Gareth Jones, Cai Larsen, Beth Lawton, Dewi Owen, Dewi Roberts, Elfed Roberts, Mair Rowlands a Gareth Williams.

Aelod Cyfetholedig: Dilwyn Elis Hughes (UCAC).

Aelod Ex-officio: Y Cynghorydd Edgar Owen.

Swyddogion yn bresennol: Vera Jones (Rheolwr Gwasanaeth Democratiaeth ac Iaith) ac Eirian Roberts (Swyddog Gwasanaethau Democratiaeth).

Yn bresennol ar gyfer eitem 5 isod:
Roland Evans (Uwch Reolwr Diwylliant a Chymuned)
Sian Pennant Jones (Rheolwr Twristiaeth a Marchnata)

Yn bresennol ar gyfer eitem 6 isod:
Llyr B.Jones (Uwch Reolwr Economi a Chymuned)

Yn bresennol ar gyfer eitem 7 isod:
Y Cynghorydd Cemlyn Williams (Aelod Cabinet Addysg)
Garem Jackson (Pennaeth Addysg)
Debbie A.W.Jones (Swyddog Gwasanaethau Corfforaethol Addysg)

1. YMDDIHEURIADAU

Y Cynghorwyr:- Freya Bentham, Aled Evans a Huw Wyn Jones.
Anest Gray Frazer (Eglwys yng Nghymru)
Y Cynghorydd Gareth Thomas (Aelod Cabinet Economi) (oedd yn dirprwyo ar ran Arweinydd y Cyngor mewn cyfarfod arall).

2. DATGAN BUDDIANT PERSONOL

Ni dderbyniwyd datganiad o fuddiant personol gan unrhyw aelod oedd yn bresennol.

3. MATERION BRYS

Dim i'w nodi.

4. COFNODION

Llofnododd y Cadeirydd gofnodion y cyfarfod blaenorol o'r pwyllgor hwn a gynhaliwyd ar 20 Mehefin, 2019 fel rhai cywir.

5. CYNLLUN GWYNEDD: PROSIECT ELWA O DWRISTIAETH

Cyflwynwyd – adroddiad yr Aelod Cabinet Economi yn diweddarau'r aelodau ar y prosiect Elwa o Dwristiaeth, oedd yn rhan o Gynllun Gwynedd. Gwahoddwyd y pwyllgor i graffu'r drefn weithredu ar gyfer y prosiect ac i graffu'r Fframwaith Twristiaeth i'r dyfodol, pan fyddai'n amserol gwneud hynny.

Ymhelaethodd y swyddogion ar gynnwys yr adroddiad, gan hefyd ymateb i gwestiynau / sylwadau gan yr aelodau.

Crynhodd y Cadeirydd brif sylwadau'r aelodau yn codi o'r drafodaeth fel a ganlyn:-

- Fel rhan o'r gwaith, mae angen ystyried y buddiannau i bobl Gwynedd, yn ogystal ag ochr arall y geiniog – yn enwedig effaith gor-dwristiaeth:-
 - ar yr iaith;
 - ar drefniadau parcio;
 - yr effaith ar bobl leol ayyb, e.e. y cynnydd mewn Air B&B's;
 - effaith ymestyn y tymor gwyliau a'r effaith ar feysydd carafanau all droi yn 'bentrefi' ychwanegol a chael effaith ar ein gwasanaethau, trefniadau cynllunio a'r iaith.

Mae'r swyddogion wedi nodi eu parodrwydd i roi cyflwyniad pellach i'r pwyllgor ar hyn, gan gynnwys rhoi mwy o gig ar yr asgwrn gyda rhai o'r opsiynau, yn arbennig gan fod rhai ohonynt yn eithaf cynhennus.

- Mae glanweithdra yn elfen amlwg sy'n effeithio ar dwristiaeth ac mae anogaeth i'r Adran ystyried yr elfen yma ymhellach a pharhau i gyd-weithio gyda Croeso Cymru, adrannau'r Cyngor, a cheisio adnabod atebion i'r problemau hyn.
- Gofynnir hefyd am y cyfle i gael mwy o eglurder o ran yr opsiynau, yn arbennig eglurder am yr achos busnes fesul opsiwn – sef cost gweinyddu, buddion ddaw allan o hyn yn ariannol ac i fusnesau a buddion i'r gymdeithas ehangach.

6. ADOLYGIAD HAFAN A HARBWR PWLLHELI

Cyflwynwyd – adroddiad yr Aelod Cabinet Economi yn rhoi diweddariad byr i'r aelodau ar y gwaith o ddatblygu gwahanol opsiynau ar gyfer yr Hafan a Harbwr Pwllheli.

Ymhelaethodd y swyddog ar gynnwys yr adroddiad, gan hefyd ymateb i gwestiynau / sylwadau gan yr aelodau.

I grynhoi, nododd y Cadeirydd fod y pwyllgor yn gallu gweld bod y gwaith yn mynd yn ei flaen. Cyflwynid adroddiad llawn i'r cyfarfod nesaf a byddai cyfle i graffu'r gwaith bryd hynny.

7. CYNLLUN PEILOT Y CANOLFANAU IAITH

Cyflwynwyd – adroddiad yr Aelod Cabinet Addysg yn gwahodd y pwyllgor craffu i gyflwyno syniadau ac awgrymiadau allai gyfrannu at yr ymchwil y bwriedid ei gynnal i fesur effaith gweithredu'r peilot mewn un Canolfan Iaith ac i fynegi barn ar y modd y bwriedid mesur effaith gweithredu'r peilot mewn un Canolfan Iaith.

Ymhelaethodd yr Aelod Cabinet, y Pennaeth Gwasanaeth a'r swyddog ar gynnwys yr adroddiad, gan hefyd ymateb i gwestiynau / sylwadau gan yr aelodau.

Crynhodd y Cadeirydd brif sylwadau'r aelodau yn codi o'r drafodaeth fel a ganlyn:-

- Croesawyd y ffaith bod y tîm sy'n gweithredu ar ran yr Adran Addysg yn dîm amlddisgyblaethol, sy'n gymysg o arbenigwyr o'r adran ac arbenigwyr allanol, ond pwysleisiwyd y dylai'r adroddiad ar gasgliadau'r ymchwil gael ei gyflwyno yn enw arbenigwr allanol, er sicrhau'r elfen wrthrychol. Croesawyd hefyd bod yna

arbenigedd ieithyddol o fewn yr Adran Addysg a bod cyfuniad o ddata meintiol ac ansoddol yn yr ymchwil.

- Croeswyd bod y fethodoleg yn adnabod yr angen i adnabod y cefndir / gwaelodlin fesul plentyn. Derbynnir bod angen mesur yn erbyn cyrraedd Lefel 2, ond mae angen ystyried ffordd deg o fesur yn erbyn y gwaelodlin.
- Mae'n allweddol sicrhau adborth gan ysgolion gan fod hyn yn allweddol i'r fethodoleg, ac mae barn ysgolion, y canolfannau iaith a'r disgyblion a'u rhieni yn hollbwysig. Mae lle hefyd i fod yn sicrhau defnyddio'r trefniadau tracio disgybl yn y tymor hwy.
- Mae pwyslais hefyd gan y pwyllgor i gadw mewn cof bod angen ystyried sut i wella safonau yn barhaus, ac nid i gynnal y safonau yn unig.
- Nododd aelodau hefyd awydd i fod yn rhan o'r broses yn barhaus, ac roeddent hefyd yn dymuno cael gwybodaeth am gost y gwaith yma eleni.
- Nodwyd hefyd bod angen i'r fethodoleg ystyried y tymor hwy a'r effaith ar ardrawiad polisi'r Cyngor ac ar ein hysgolion yn y tymor hwy.
- Codwyd pryder am yr amserlen, a rhoddwyd neges glir ynglŷn â phwysigrwydd gwneud y gwaith yn gywir.

Dechreuodd y cyfarfod am 10.30 y.b. a daeth i ben am 12.40 y.h.

CADEIRYDD